

Bingzsiengz Si Guh Hozdung“4·15”Ngoenz Son Guekgya Ancienz Daengx Biengz Caeuq Senhconz Minzczu Fapceih

4 nyied 15 hauh dwg ngoenz son guekgya ancienz daengx biengz, dangngoenz, Bingzsiengz Si youq Bujcai Goujan guh hozdung senhconz minzczu fapceih, daengx si gyoengq cwngzienz danhvei “bouxlawz caepfap bouxlawz bujfaz” caeuq Youjyizgvanh Haijgvanh、Nanzningz Haijgvanh capyouq Bingzsiengz danhvei caemh guh.

Ndaw hozdung, ginzung daenj buhvaq minzczu gyaundeidei doq ciengq doq foux, doengzcienz dinghdangh nabfuk、doiqfwen daengj cezmuz gig

ndeidei yawj. Haeuxnaengj haj saek、saw veh baijok yinx yienhciegz bouxyawj youh yawj youh ingj, hozdung aeu vwnzva guh moiz、yungh gigwn guh giuz, hawj senhconz fapceih engq miz rengzhoengh.

Hozdung doenggvaq hingzsik “fapceih doxcomz senhconz + vwnzva guh’ angq dox baedauq”, senhconz 《Cunghvaz Yinzminz Gunghozgoz Yenfaz》、《Cunghvaz Yinzminz Gunghozgoz Minzfazdenj》、minzczu lijun cwngcwz daengj faplwd fapgi hawj ginzung, hawj gyoengqvunz rox

fuengzre densin yaeuhlox、ciengxlaux yaeuhlox、fanj sezgyau、duzbinj famhcoih daengj cihsiz, gyauyuz dazyinx ginzung gag rox henhoh minzczu doxgiet, bang gyoengq beksingq henzguk miz sim rox soujap, caemh henhoh henzguk ancienz onjdingh.

Gaenh geij bi daeuj, Bingzsiengz Si gaenj gau couqmaenh gij eiqsik Cunghvaz Minzczu ranz vunz ndeu guh diuz sienqmeh, laebdaeb damqra aen vunqsik moq bujfaz “minzczu daegsaek + fapceih yenzsu”, hawj

fapceih cingsaenz caprag henzguk. Youq mwh “sam nyied sam”, Bingzsiengz Si swhfaz hingzcwng hidungj giethab cienhangh hengzdoengh “cimh henzguk bae bujfaz”, guh fapceih senhconz gyauyuz hawj henzguk ancienz、minzczu doxgiet, dwkdoeng henzguk fapceih senhconz “aen goengleix ceiq doeklaeng”, hawj fapceih cienz daengz cien fanh ranz, caemh veh bien gyaundeidei minzczu doxgiet ranz vunz ndeu.

(Moz Ginz/莫群)

Nanzningz: Liengzging Gih Angqhoh Haihaw 290 Hopbi

4 nyied 17 hauh, Nanzningz Si Liengzging Gih Liengzging Cin youq Baujli Vuzyouhlij Haw Gaicawx guh hozdung angqhoh ciet haihaw caeuq guh haw 290 hopbi. Hozdung neix dwg gij saedhengz youqgaenj couqmaenh gij eiqsik Cunghvaz Minzczu ranz vunz ndeu, hozdung doenggvaq feihyiz yienjok、minzsug doxdax daengj hingzsik, supyinx Bouxgun、Bouxcuengh、Yauzczu daengj 12 aen minzczu 2000 lai boux ginzung doxcomz daeuj guh’ angq, yienh’ ok gij heiqaenh guh ciet “aeu vwnzva cimqnyinh coicaenh minzczu doxgiet”.

(Guj Siuhungz/古小红)



▲Ginzung roq gyong diuq foux nauhyied dangqmaz.



▲Doxdax yienhciegz siuhfangzyenz ndaep feiz. Cinz Swngcungh ingj

Yungzsuij: Doxdax Dinfwngz Siuhfangz

4 nyied 16 hauh, Yungzsuij Myauzczu Swciyen guh hozdung 2025 nienz daengx yienh cizgungh dinfwngz cizez doxdax haidoengh yizsiz caeuq dinfwngz siuhfangz doxdax, daengx yienh 62 aen daibyaujdui 260 boux cizgungh camgya hozdung. Hozdung muzdiz dwg yungh ndei dinfwngz cizez doxdax guhyienh dazyinx beizyangj bouxcaiz dinfwngz, haenqrenz fatyiengz cingsaenz guhhong、cingsaenz lauzmox、cingsaenz bouxcangh, vih dajcauh aen vunzcaiz duivuj suciz sang、dinfwngz sang ndeu daj giekdaj maenhdaed.

(Cinz Swngcungh/秦胜聪 Cau Siuhyah/赵潇晓)

Hocouh: Mbaet Caz Seizcin

4 nyied 15 hauh, Hocouh Si Bingzgvei Gih Ngozdangz Cin Mbanjbanzguj boux ndaem caz youq ndaw suencaz gwnz bya sang mbaet caz seizcin. Seizcin dwg geiqciet mbaet caz ceiq nyaengq, bouxndaemcaz cagaenj seizgan mbaet caz aeu bae haw gai, bouxndaemcaz mbaet caz gvaq ndoi youh gvaq bo nyaengqdikdik. Seizneix Hocouh suencaz najdieg miz 30 fanh moux, caz canjnieb bouxguhhong mauhgvaq 13 fanh vunz, cietsaed daiqdoengh dangdieg ginzung demsou baenzfouq.

(Liu Cujbingz/廖祖平)



▲Gyoengq bouxndaemcaz youq ndaw suencaz mbaet caz.